



**Sumáriu Kazu**  
**Tribunál Distritál Baukau**  
**Fevereiru 2022**

**Afirmasaun:** Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

**A. Sumáriu prosesu julgamentu kazu iha Tribunál Distritál Baukau**

**1. Totál kazu ne'ebé JSMP monitoriza: 29**

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika (VD) sira no artigu 36 kona-ba krime sira violénsia doméstika nian hanesan krime públiku)	9
Artigu 154 KP & artigu 2, 3, no 35 letra (a) LKVD	Maus-tratus ba konjúje	4
artigu 20 (1) Lei Arma Barnkas	Arma Brankas	2
Artigu 145 KP & artigu 258 KP	Ofensa ba integridade física simples no danu simples	2
Artigu 145 KP	Ofensa ba integridade física simples	3
Artigu 172 KP	Violasaun seksual	1
Artigu 258 KP	Danu simples	1
Artigu 145 KP & artigu	Ofensa ba integridade física simples ho natureza	1

2, 3, no 35 letra (b) LKVD no Artigu 20 (1), artigu 2 (2 alinea f) Lei Arma Brankas	VD no arma brankas	
Artigu 138 KP & Artigu 20 (1), artigu 2 (2 alinea f) Lei Arma Brankas	Omisídiu simples no arma brankas	1
Artigu 258 KP, artigu 252(1) KP & artigu 145 KP	Danu argravad, furtu simples no ofensa ba integridade fizika simples	1
Artigu 157 KP & Artigu 20 (1), artigu 2 (2 alinea f) Lei Arma Brankas	Ameasa no arma Brankas	1
Artigu 146 (1) KP	Ofensa ba integridade fizika grave	1
Artigu 157 KP, Artigu 154 KP & artigu 2, 3, no 35 letra (a) LKVD	Ameasa no Maus-tratus ba konjuje	1
Artigu 145 KP & Artigu 20 (1), artigu 2 (2 alinea f) Lei Arma Brankas	Ofensa ba integridade fizika simples no arma brankas	1
<b>Totál</b>		<b>29</b>

**2. Totál desizaun ne'ebé JSMP monitoriza: 22**

Tipu desizaun	Artigu	Númeru
Pena prizaun	Artigu 66	2
Suspensaun ba prizaun nia ezekusaun	Artigu 68 KP	13
Pena multa	Artigu 67 KP	2
Omologa	Artigu 216 KPP	5
<b>Totál</b>		<b>22</b>

**3. Totál kazu sira ne'ebé adia tuir JSMP nia monitorizasaun: 0**

**4. Totál kazu ne'ebé sei kontinua prosesu tuir JSMP nia monitorizasaun: 7**

**B. Deskrisaun sumáriu julgamentu ba desizaun kazu sira:**

## **1. Krime maus-tratus ba kónjuje**

Nú. Prosesu : 0015/19. VQWCB  
Kompozisaun Tribunál : Koletivu  
Juis : Dra. Florencia Freitas, Dra. Jumaity Maria Freitas no  
Dra. Sribuana da Costa  
Prokuradór : Dr. Ambrosio Rangel Freitas  
Defeza : Dr. Sidonio Maria Sarmiento  
Desizaun : Pena prizaun tinan 2 suspende ba tinan 2

Iha 02 Feveireiru 2021, Tribunál Distritál Baukau prezide Julgamentu leitura akordaun ba krime maus-tratus ba kónjuje ne'ebé envolve arguidu VP hasoru nia feen, iha Munisípiu Vikeke.

### **Akuzasaun Prokuradór**

Prokuradór akuza katak iha iha 24 Outubru 2019 arguidu fila husi Baukau derepente buti lezada nia kakorok, tuku dala tolu iha ulun bainhira lezada hakilar hafoin arguidu para nia hahalok ne'e. Iha 25 Outubru 2019 lezada sei toba hela arguidu lori kadoo ai baku dala tolu iha lezada nia kotuk laran no lezada atu halai arguidu tuku dala tolu iha kabaas no uza kadoo ai baku dala ida iha ulun. Bainhira lezada ba vizita nia família arguidu sempre hirus nune'e lezada la konfortavel ho arguidu nia hahalok no ikus lezadda ba hela iha nia inan-aman.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklara katak akontese iha 24 no 25 Outubru 2019 ninia motivaun mak arguidu ho kondisaun lanu, agora sira moris separa ona, arepende ba nia hahalok, foin primeiravés mai hatan iha tribunál.

Iha parte seluk, lezada deklara iha 24 no 25 Outubru 2019 arguidu ho kondisaun lanu no sein motivaun ruma derepente arguidu halo agresaun no antes ne'e kuandu arguidu kondisaun lanu sempre istoria malu ho lezada. Lezada la konfortavel ho arguidu nia hahalok nune'e agora ba hela ho nia inan-aman no lezada lakohi fila-fali ba arguidu.

### **Alegasaun finál**

Prokuradór haktuir katak arguidu provadu halo maltratamentu ba nia kónjuje bazeia ba arguidu nia konviksaun no lezada konfirma, lezada sente ladun konfortavel ho arguidu nia aktu krúel iha loron rua tui-tuir malu nune'e lezada halai ba nia inan-aman nia uma

to'ogora moris separa ho arguidu, atu prevene arguidu nia hahalok ne'e iha futuru husu ba ba tribunál atu aplika pena prizaun tinan rua suspende ba tinan rua.

Entretantu defeza husu ba tribunál atu aplika pena ne'ebé kamaan liu ba arguidu ho konsiderasaun sira katak arguidu konfesa faktu sira, arrepende nia hahalok no foin primeiravés mai hatan iha tribunál.

### **Desizaun**

Depoisde avalia faktu hotu, tribunál prova katak 24 Outubru 2019 arguidu buti lezada nia kakorok, tuku dala tolu iha ulun. Iha 25 Outubru 2019 arguidu lori kadoo ai baku dala tolu iha lezada nia kotuk laran no bainhira lezada atu halai arguidu tuku dala tolu iha kabaas no uza kadoo ai baku dala ida iha ulun. Arguidu ho lezada moris separa too agora.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa faktu sira, arrepende niania hahalok, foin primeiravés mai hatan iha tribunál, nune'e tribunál konklui prosesu ne'e kondena arguidu ho pena prizaun tinan rua supende ba tinan rua.

### **2. Krime arma brankas**

Númeru prosesu	: 0008/20. VQWCB
Kompozisaun tribunál	: Koletivu
Juís	: Dra. Florencia Freitas, Dra. Jumiaty Maria Freitas no Dra. Sribuana da Costa
Prokuradór	: Dr. Julio da Silva Correia
Defeza	: Dr. António Fernades
Desizaun	: Pena prizaun tinan 3 suspende ba tinan 3

Iha 03 Feveireiru 2021, Tribunál Distritál Baukau prezide Julgamentu leitura akordaun ba krime arma Brankas ne'ebé envolve arguidu João Basilio hasoru Estadu RDTL iha suku Irabin de Baisu postu administrasaun Watukarbau Munisípiu Vikeke.

### **Akuzasaun Prokuradór**

Prokuradór akuza katak iha 01 Maiu 2020 iha oras tuku 18:00 lokraik, arguidu baku rahun tiha kadeira masa tolu hafoin arguidu foti tudik atu sona lezadu, maibé la konsege sona tanba Sr. Tome hanesan testemuña hadau tiha tudik husi arguidu nia liman, arguidu nia hahalok ne'e halo lezadu tauk no trauma.

Prokuradór akuza arguidu kontra artigu 20 (1) husi lei Arma Barnkas ho moldura penál tinan 3 to'ogora tinan 6.

### **Produsaun ba prova sira**

Iha prosesu julgamentu, arguidu deklara katak iha 01 Maiu 2020 iha oras tuku 18:00 lokraik testemuña koalia bei-beik no haruka arguidu atu ba kesi karau ne'e mak arguidu

nervozu tebe rahun tiha kadeira no foti tudik modo nian iha dapur hafoin testemuña Tome mai hadau tiha tudik ne'e, arguidu la uza tudik hodi ameasa testemuña.

Alende ne'e, testemuña Julio Fernades deklara katak testemuña haruka arguidu atu ba kesi karau, derepente arguidu tebe rahun kadeira masa tolu no testemuña haree arguidu hasai tudik husi nia bolsu hodi soe tiha ba kotuk hafoin nia maun Tome mai baku arguidu no arguidu mós la uza tudik amesa testemuña.

Testemuña Tome Fernandes depoimentu katak rona nia pai haruka arguidu atu ba kesi karau derepente arguidu tebe rahun tiha kadeira hamutuk tolu no hasai tudik husi bolsu hodi ameasa pai ne'e mak testemuña ba satan netik tiha.

### **Alegasaun finál**

Prokuradór haktuir katak arguidu konfesa kaer duni tudik no testemuña Tome mós deklara katak arguidu uza duni tudik hodi ameasa testemuña Julio mezmú testemuña Julio mai nega faktu sira iha akuzasaun. Arguidu provadu komete krime arma brankas, tanba ne'e husu ba tribunál atu kondena arguidu ho pena prizaun tinan rua suspende ba tinan rua.

Entretantu, defeza akresenta katak iha produsaun prova nota katak arguidu la uza tudik hodi ameasa testemuna Julio no testemuña Julio rasik mós dehan arguidu la uza tudik amesa testemuña, ho razaun hirak ne'e husu ba tribunal absolve arguidu husi prosesu.

### **Desizaun**

Depoisde avalia faktu hotu, tribunál prova katak arguidu uza tudik ameasa duni lezadu hafoin testemuna mai impede.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa faktu sira, arrepende ninia hahalok, di'ak malu ona ho lezada, primeiravés mai hatan iha tribunál, nune'e tribunál konklui prosesu ne'e kondena kada arguidu ho pena prizaun tinan tolu suspende ba tinan tolu

### **3. Krime ofensa ba integridade fizika simples no danu simples**

Númeru prosesu	: 0007/18. BCQLC
Kompozisaun tribunál	: Singulár
Juís	: Dra. Florencia Freitas
Prokuradór	: Dr. Ambrosio Rangel Freitas
Defeza	: Dr. Grigório Maria Lourdes de Lima
Desizaun	: Omologa no dezistencia keixa

Iha 07 Feveireiru 2022, Tribunál Distrital Baukau prezide Julgamentu tentativa konsiliaun no omologa ba krime ofensa ba integridade fizika simples no danu simples ne'ebé envolve arguidu Ricardo Boavida, Manuel Freitas no Mateus Soares de Jesus hasoru lezadu Clementino Cabral, iha suku Bualale Postu Administrativu Kelikai Munisípiu Baukau.

### **Akuzasaun prokuradór**

Prokuradór akuza katak iha Feveireiru 20218 iha oras tuku 17:00 lokraik arguidu Manuel Freitas to'o uluk iha lezadu nia uma no foti lezadu nia kanuru rai henek nian hodi baku moru no ai-rin kuaze estraga hotu. Hafoin arguidu seluk Ricardo Boavida to'o direitamente tebe dala ida iha lezada nia ain loos no hadau lezadu nia ai-tonka rezulta monu ba rai no bainhira lezadu tenta atu hamri'ik arguidu Mateus Soares hadau tan lezadu nian ai tonka rezulta lezadu monu ba rai. Motivu husi akontesimentu ne'e tanba lezadu oukupa arguidu sira nia rai.

Prokurador akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa no 258 KP kona-ba danu simples ho moldura penál to'o tinan 3 ka multa.

### **Prosesu tentativa konsiliaun**

Baziea ba artigu 262 KPP antes tama ba iha produsaun ba prova tribunál halo tentativa ba konsiliaun ba krime sira ho natureza semi-públiku. Iha prosesu tentativa ba konsiliaun ne'e lezadu hakarak deziste ninia keixa hasoru arguidu sira tanba arguidu ho lezadu sira mesak família. Perante tribunál arguidu nain tolu kaer liman ho lezadu no husu deskulpa ba lezadu arguidu sira hatudu sira nian arrendementu katak saida mak sira halo ba lezadu ne'e hahalok la di'ak.

### **Alegasaun finál**

Prokuradór haktuir katak iha tentativa konsiliaun ne'e lezadu hakarak deziste nia keisa tanba krime ne'e rasik defende ba keisa nune'e prosesu atu kontinua ka lae ne'e lezitimidade iha lezadu, arguidu sira perante tribunál husu ona deskulpa ba lezadu. Bazeia ba sira nia akordu perante tribunál nune'e husu ba tribunál omologa dezistensia keisa refere.

Entretantu, Defeza haktuir katak perante tribunál arguidu sira hatudu ona sira nian hahalok no husu ona deskulpa ba lezadu sira simu nu'udar família. Bazeia ba sira nian akordu husu ba tribunal omologa dezistensia keisa no absolve arguidu husi prosesu.

### **Desizaun**

Bazeia ba artigu 262 KPP, tribunál halo tentativa konsiliaun entre parte sira no lezadu deziste nia keixa hasoru arguidu sira ho kondisaun arguidu sira husu deskulpa ba lezadu, nune'e tribunál hasai ninia despaixu hodi omologa dezistensia keixa no absolve arguidu sira husi prosesu.

#### **4. Krime ofensa ba integridade fizika simples**

Númeru prosesu	: 0013/20. BCLGA
Kompozisaun tribunál	: Singulár
Juís	: Dra. Sribuana da costa
Prokuradór	: Dr. Ambrosio Rangel Freitas
Defeza	: Dr. Grigório Maria Lourdes de Lima

Desizaun

: Omologa no dezistensia keisa

Iha 07 Feveireiru 2022, Tribunál Distritál Baukau prezide Julgamentu tentativa konsiliaun no omologa ba krime ofensa ba integridade fizika simples ne'ebé envolve arguidu Aderito da costa Xavier no Marcelino da Costa Xaviers hasoru lezadu Jeronimo de Almeida, iha suku Samalri Postu Administrativu Laga Munispiu Baukau.

### **Akuzasaun prokuradór nian**

Prokuradór akuza katak iha 01 Abril 2020 iha oras tuku 18:30 lokraik lezadu ho motor mio street matrikula O. 5287.TL, halai mai, arguidu sira hapara iha dalan nune'e lezadu mos para tiha motor depois arguidu Aderito hakbesik ba lezadu no husu ba lezadu dehan 'ó atu ba ne'ebe' no arguidu sira tuku kedas dala ida iha lezadu nia kanuruk no tebe dala ida iha kotuk laran. Depois arguidu Marcelino mós tebe dala rua iha lezadu nia hirus matan.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa

### **Prosesu tetantiva konsiliaun**

Baziea ba artigu 262 KPP antes tama ba iha produsaun ba prova tribunál halo tentativa ba konsiliaun ba krime sira ho natureza semi-públiku. Iha prosesu tentativa ba konsiliaun ne'e lezadu hakarak deziste ninia keixa hasoru arguidu sira tanba arguidu ho lezada sira mesak família. Perante tribunál arguidu nain rua kaer liman ho lezadu no husu deskulpa ba lezadu, arguidu sira hatudu sira nian arrendementu katak saida mak sira halo ba lezadu ne'e hahalok la di'ak.

### **Alegasaun finál**

Prokuradór haktuir katak iha tentativa konsiliaun ne'e lezadu hakarak deziste nia keisa tanba krime ne'e rasik defende ba keisa nune'e prosesu atu kontinua ka lae ne'e lezitimidade iha lezadu, arguidu sira perante tribunál husu ona deskulpa ba lezadu. Bazeia ba sira nia akordu perante tribunál nune'e husu ba tribunál omologa dezistensia keixa refere.

Entretantu, Defeza haktuir katak perante tribunal arguidu sira hatudu ona sira nian hahalok no husu ona deskulpa ba lezadu sira simu nu'udar família. Bazeia ba sira nia akordu husu ba tribunal omologa dezistensia keixa no absolve arguidu husi prosesu.

### **Desizaun**

Depoisde tentativa konsiliaun ne'ebé previstu iha artigu 262 KPP lezadu deziste nia keixa hasoru arguidu sira ho kondisaun arguidu sira husu deskulpa ba lezadu, nune'e tribunál hasai ninia despaisu hodi omologa dezistensia keixa no absolve arguidu sira husi prosesu.

## **5. Krime ofensa ba integridade fizika simples no danu simples**

Númeru prosesu

: 0072/21. BCBCV

Kompozisaun tribunál : Singulár  
Juís : Dra. Sribuna da Costa  
Prokuradór : Dr. Ambrosio Rangel Freitas  
Defeza : Dr. Sidonio Maria Sarmiento  
Desizaun : Omologa no dezistencia keisa

Iha 07 Feveiru 2022, Tribunál Distritál Baukau prezide Julgamentu tentativa konsiliaun ba krime ofensa ba integridade fizika simples no danu simples ne'ebé envolve arguidu Jorge Delio Marçal Cabral Belo hasoru lezadu Agostinho Soares, iha suku Tirilolo Postu Administrativu Baukau Vila Munisípiu Baukau.

### **Akuzasaun prokuradór**

Prokuradór akuza katak iha 03 Jullu 2021 iha oras tuku 23:00 kalan iha Bairro Watulete aldeia Lutumutu lezadu assiste joga bola entre Nasaun Italia ho Belgia, lezadu haree arguidu ho nia kolega sira hemu tua mutin no lezadu ba arguidu haruka lezadu atu hemu tua hamutuk ho sira maibé lezadu lakohi nune'e arguidu diskute malu ho lezadu derepente arguidu tebe dala rua iha lezadu nia kotuk laran rezulta lezadu monu iha aspal leten halo nia sorin parte loos hetan kanek no nia kabaas parte karuk hetan kanek no bubu, tuir mai arguidu tuku dala tolu iha iha lezadu nia ibun rezulta ibun kanek, tuku dala ida iha tilun hun. Arguidu mós les lezadu nia faru ne'ebé nia hatais.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa.

### **Prosesu tetantiva konsiliaun**

Baziea ba artigu 262 KPP antes tama ba iha produsaun ba prova tribunál halo tentativa ba konsiliaun ba krime sira ho natureza semi-públiku. Iha prosesu tentativa ba konsiliaun ne'e lezadu hakarak deziste ninia keixa hasoru arguidu tanba arguidu sira mesak joven iha Bairro ida de'it. Perante tribunál arguidu ho konsensia rasik halo tratamentu ba lezadu nia kanek ho osan US\$200.00, husu deskulpa ba lezadu no lezadu mos simu no konkorda hodi deziste tiha nia keixa hasoru arguidu.

### **Alegasaun finál**

Prokuradór haktuir katak iha tentativa konsiliaun ne'e lezadu hakarak deziste nia keisa tanba krime ne'e rasik defende ba keisa nune'e prosesu atu kontinua ka lae ne'e lezitimidade iha lezadu, perante tribunál arguidu ho kondisaun sira hanesan husu deskulpa ho osan US\$200.00 ba lezadu hodi rekopera fali lezadu nian sofrimentu. Bazeia ba sira nia akordu perante tribunál nune'e husu ba tribunál omologa dezistencia keisa refere.

Entretantu, Defeza haktuir katak perante tribunál arguidu hatudu nia arependementu no hanoin rasik husu deskulpa ho osan US\$200.00 ba lezadu hodi hakmaan sofre ne'ebé lezadu hetan. Bazeia ba sira nian akordu husu ba tribunál omologa dezistencia keixa no absolve arguidu husi prosesu.

### **Desizaun**



Bazeia ba artigu 262 KPP, tribunál halo tentativa konsiliaun no lezadu konkorda deziste nia keixa hasoru arguidu ho konsiderasaun arguidu husu diskulpa hodi fó osan US\$200.00 ba lezadu, nune'e tribunál hasai ninia despaixu hodi omologa dezistencia keisa no absolve arguidu sira husi prosesu.

#### **6. Krime ofensa ba integridade física simples ho natureza violéncia doméstika**

Nú. Prosesu : 0030/21. LALPL  
Kompozisaun Tribunál : Singulár  
Juis : Dr. Florencia Freitas  
Prokuradór : Dr. Bartolomeu de Araújo  
Defeza : Dr. Grigório Maria Lourdes de Lima  
Desizaun : Pena prizaun fulan 4 suspende ba tinan 1

Iha 08 Feveiru 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu JG hasoru nia feen, iha Munisípiu Lautein.

#### **Akuzasaun Prokuradór**

Prokuradór akuza katak iha 13 Juñu 2021 iha oras tuku 02:00 madrugada arguidu kontaktu ba ninia amante nune'e lezada rona no hasee, derepente arguidu fila buti lezada nia kakorok soe sai lezada nia roupa no tuku lezada nia isin loloon.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

#### **Produsaun ba prova sira**

Iha prosesu julgamentu, arguidu deklara katak arguidu kontaktu ba nia alin fetu mak lezada intende sala, mosu diskusaun arguidu nervozu basa dala rua iha kotuk laran kona ba faktu sira seluk la loos hotu. Depoizde akontese to'o agora sidauk di'ak malu, foin primeiravés mai hatan iha tribunál no promete sei la komete tan krime seluk iha futuro. Arguidu nu'udar agrikultór rezultadu hodi sustenta de'it ba família.

Alende ne'e, lezada deklara katak iha 13 Juñu 2021 iha oras tuku 02:00 madrugada lezada rona arguidu kontaktu ho nia amante ne'e mak lezada husu tuir, sira diskute malu no arguidu buti lezada nia kakorok, tuku dala ida iha tilun hun, lezada la ba halo tratamentu iha ospital. Depoizde akontese lezada diside moris separa ho aguidu no fila ba hela ho nian inan-aman iha Munisípiu Vikeke.

#### **Alegasaun finál**

Prokuradór haktuir katak arguidu nega faktu maibé deklara katak nia so basa de' it dala rua iha kotuk laran, basa ne'e mós krime ona maibé lezada mai ho juramentu hodi konfirma faktu hotu iha akuzasaun katak arguidu halo duni agresaun hanesan iha akuzasaun. Tanba ne'e husu ba tribunál atu kondena arguidu ho pena prizaun fulan rua suspende ba tinan ida.

Entretantu, defeza akresnte katak mezmú arguidu konfesa parsial maibé arguidu hatudu nian arremendementu, tanba ne'e husu ba tribunál aplika pena maiz adekuadu ba arguidu.

### **Desizaun**

Depoisde avalia faktu hotu, tribunál prova katak arguidu buti lezada nia kakorok soe sai lezada nia roupa no tuku dala ida iha lezada nian tilun hun.

Bazeia ba faktu provadu sira ne'e no tetu mós sirkunstánsia atenuante sira hanesan arremende ninia hahalok, nune'e tribunál konklui prosesu ne'e kondena arguidu ho pena prizaun fulan haat suspenbe ba tinan ida.

### **7. Krime ofensa ba integridade fizika simples ho natureza violénssia doméstika**

Nú. Prosesu : 0011/19. BCEVN  
Kompozisaun tribunál : Singulár  
Juís : Dra. Florencia Freitas  
Prokuradór : Dr. Ambrosio Rangel Freitas  
Defeza : Dr. Sidonio Maria Sarmiento  
Desizaun : Pena multa US\$30.00

Iha 09 Feveireiru 2022, Tribunál Distritál Baukau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguida ELdS hasoru nia la'en, iha Munisípiu Baukau.

### **Akuzasaun prokuradór nian**

Prokuradór akuza katak iha 17 Maiu 2019 iha oras tuku 10:00 dadeer arguida tuku dala ida iha lezadu nia liman brasu, tuku dala ida iha kabun, basa dala ida iha hasan no rakut lezadu nia faru. Motivú husi akontesimentu ne'e tanba lezadu hakarak fahe malu ona ho arguidu ka lakohi moris hamutuk ona ho arguida.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha produsaun ba provas arguida deklara katak lezadu fila husi serbisu inglatera la mai uma maibé ba hela fali ho fetu seluk, derepente lezadu mosu iha uma ne'e mak arguida nervozu halo agresaun hasoru lezadu. Arguida ho oan nain rua agora hela iha uma ne'ebé antes lezadu ba Inglaterra halo hela no agora lezadu hola ona fetu seluk.

Enkuantu lezadu konfirma faktu sira iha akuzasaun, lezadu ho arguida seidak di'ak malu lezadu hola fali ona fetu seluk, arremende ninia hahalok.

### **Alegasaun finál**

Iha julgamentu arguida konfesa faktu hotu ne'ebé konstitui ba krime no lezadu mós konfirma akuzasaun, depois akontese to'o agora sira sidauk di'ak malu, arguida koopera ho justisa nune'e la difikulta tribunál atu hetan verdade iha prosesu ne'e. Tanba ne'e husu ba tribunál atu kondena arguidu ba pena prizaun fulan neen suspende ba tinan ida.

Enkuantu defeza husu ba tribunál fó pena ne'ebé kmaan ba arguida tanba arguida konfesa faktu hotu iha akuzasaun sein rezrva, arrepende ninia hahalok.

### **Desizaun**

Depoisde avalia faktu hotu, tribunál prova katak arguida tuku dala ida iha lezadu nia liman brasu parte karuk, tuku dala ida iha kabun, basa dala ida iha hasan no rakut lezadu nia faru.

Bazeia ba faktu provadu sira ne'e no tetu mós sirkunstánsia atenuante sira hanesan arrepende ona ninia hahalok, foin primeravés mai hatan iha tribunál, sira moris separa ona nune'e tribunál konklui prosesu ne'e kondena arguida ho pena multa US\$30 kada loron 0,50 sentavus durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

### **8. Krime maus-tratus ba kónjuje**

Númeru prosesu	: 0011/20. VQLLT
Kompozisaun tribunál	: Koletivu
Juís	: Dra. Florencia Freitas, Dra. Jumiaty Freitas no Dra. Sribuana da Costa
Prokuradór	: Dr. Ambrosio Rangel Freitas
Defeza	: Dr. Sidonio Maria Sarmiento
Desizaun	: Pena prizaun tinan 2 suspende ba tinan 2

Iha 10 Feveireiru 2022, Tribunál Distritál Baukau prezide Julgamentu leitura akordaun ba krime maus-tratus ba kónjuje ne'ebé envolve arguidu SFS hasoru nia feen, iha Munisípiu Vikeke.

### **Akuzasaun Prokuradór**

Prokuradór akuza katak iha 29 Agostu 2020 arguidu foti ai-sanak hodi baku dala barak iha lezada nia ulun no iha 31 agostu 2020 arguidu lori ai-sanak baku dala barak iha lezada nian isin loloon, motive husi akontesementu tanba lezada ba faan iha merkadu husik hela sira nia oan mesak iha uma.

Prokuradór akuza arguidu kontra artigu 154 KP kona-ba mau-stratus ba kónjuje ho moldura penál tinan 2 to'o tinan 6, konjuga ho artigu 2, 3, 35 LKVD.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklarara tan katak depoisde akontese la baku ona lezada, arrepende ba nia hahalok, di'ak malu ona no

promete ba tribunál sei la repete ninia hahalok ne' e hasoru lezada ka ema seluk iha futuru, foin primeiravés mai hatan iha tribunál, servisu nu' udar agrikultór rezultadu hodi sustenta de' it ba família.

Entretantu, lezada kontinua konfirma faktu sira hotu iha akuzasaun no deklara katak depoisde akontesementu to'o agora arguidu la halo ona agresan fíziku hasoru lezada. Lezada mós haktuir tan depoisde akontesementu sira di' ak malu kedas no la baku ona lezada to'o agora.

### **Alegasaun finál**

Prokuradór konsidera arguidu nia hahalok ne'e provadu tuir faktu sira hotu iha akuzasaun tanba iha produsaun ba prova arguidu rasik konfesa integralmente no lezada konfirma akuzasaun sein rezerva nune'e prokuradór intende katak arguidu provadu komete krime ne'ebé imputa ba nia, razaun hirak ne'e husu ba tribunál atu kondena arguidu ho pena prizaun tinan rua suspende ba tinan rua

Entretantu defeza intende katak durante iha produsaun ba prova arguidu rasik iha kolaborasaun di'ak ho tribunál hodi konfesa faktu hotu iha akuzasaun, arrepende ninia hahalok, di'ak malu ona, foin primeiravés mai hatan iha tribunál. Tanba ne'e, husu ba tribunál atu aplika pena ne'ebé kmaan liu ba arguidu.

### **Desizaun**

Depoisde avalia faktu hotu, tribunál prova katak iha 29 Agostu 2020, arguidu foti aisanak hodi baku dala barak iha lezada nia ulun no iha 31 Agostu 2020 arguidu lori aisanak baku dala barak iha lezada nia isin loloon.

Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

## **9. Krime koasaun seksuál**

Númeru prosesu	: 0001/21. VQWCB
Kompozisaun tribunál	: Koletivu
Juís	: Dra. Florencia Freitas, Dra. Jumiaty Freitas no Dra. Sribuana da Costa
Prokuradór	: Dr. Ambrosio Rangel Freitas
Defeza	: Dr. Sidonio Maria Sarmiento
Desizaun	: Pena prizaun tinan 3 suspende ba tinan 3

Iha 10 Feveireiru 2022, Tribunál Distritál Baukau prezide julgamentu leitura akordaun ba krime koasaun seksuál ne'ebé envolve arguidu JX hasoru lezada LP iha Munisípiu Vikeke.

### **Akuzasaun Prokuradór**

Prokuradór akuza katak iha 25 Janeiro 2021 iha oras tuku 07:00 dadeer Sr. Cipriano ba bolu arguidu iha nia residencia hodi halo Sr. Cipriano nia natar ne'ebé lokaliza iha áreia Mauleuk Vikeke. Nune'e iha oras tuku 11:00 dadeer arguidu ba natar refere, kuandu to'o iha natar arguidu informa ba Sr. Cipriano katak nia moras, nune'e arguidu ba toba fali iha uma natar. Altura ne'ebá lezada ba iha uma natar atu foti fos hodi tein etu ba nia maun sira ne'ebé mak halo natar. Bainhira lezada tama ba uma laran nia haree arguidu toba hela iha uma laran no lezada kontinua ba foti fos hodi tau iha lafatik laran atu hamós, derepente arguidu hadeer mai kaer metin lezada nia liman rua hamutuk hafoin arguidu buti lezada nia hirus matan parte loos, tanba ne'e lezada rasta nia liman tuku iha arguidu nia hirus matan, arguidu husik tiha lezada nia liman, lezada foti fos iha lafatik atu sai husi uma laran mak arguidu hakuak lezada husi kotuk no buti metin lezada nia hirus matan parte rua maibé lezada uza liman sikun fai ba arguidu nia hirus matan no arguidu husik kedas lezada no halo fos mós fakar tiha. Lezada halai sai husi uma laran ba fó hatene nia maun Cipriano iha natar laran.

Prokuradór akuza arguidu komete krime kontra artigu 171 KP kona-ba koasaun seksuál ho nia moldura penál tinan 2 to'o tinan 8.

### **Produsaun ba prova sira**

Iha prosesu julgamentu, arguidu deklara katak momentu arguidu toba iha uma natar no toba hanehan fos iha hadak leten derepente lezada ba foti fos ne'ebé arguidu toba hanehan halo arguidu hakfodak liki nia liman rua ba kona iha lezada nia hirus matan no lafatik mós monu tun hafoin lezada foti lafatik ne'e hodi baku fali ba hau no dehan hau mak kaer nia susun.

Entretantu lezada kontinua konfirma faktu hotu iha akuzasaun, depois akontese arguidu halai ba eskudra Polísia ne'e mak lezada ho nia maun mós ba tuir arguidu iha eskudra Polísia hodi informa kedas kazu ne'e ba Polísia.

Testemuña Cipriano da Costa Ximenes nu'udar lezada nia maun depoimentu katak arguidu dehan moras ne'e mak toba hela iha uma natar maibé testemuña akompañia ema sira ba kuda haree, derepente lezada halai ba dehan, arguidu buti lezada nian susun ne'e mak lezada ho testemuña fila ba uma no kontinua ba Polísia no haree arguidu iha ona eskudra Polísia.

### **Alegasaun finál**

Prokuradór haktuir katak mezmú arguidu konfesa parsialmente ba faktu maibé lezada mai konfirma no testemuña mós rona informasaun husi lezada no kontinua ba iha eskudra Polísia hodi hato'o kazu ne'e ba Polísia. Arguidu la hatudu nian arrrespondementu no la kolabaroa ho tribunál hodi deskoberta verdade iha prosesu ida ne'e, atu prevene arguidu nia hahalok iha futuru husu ba tribunál atu kondena arguidu ho pena prizaun tinan haat.

Enkuantu defeza haktuir katak bazeia ba produsaun prova iha audénsia julgamentu arguidu la iha intensaun atu kaer lezada nia hirus matan maibé lezada mak foti fos la fó hatene nune'e halo arguidu hakfodak mak liki nia liman kona iha lezada nia hirus

matan. Arguidu foin primeiravés mai hatan iha tribunál, ho razaun hirak ne'e husu ba tribunál fó pena ne'ebé kmaan ba arguidu.

### **Desizaun**

Depoizde avalia faktu hotu, tribunál fiar liu ba lezada nia deklarasaun ne'ebe konfirma faktu iha akuzasaun, provadu hotu mak arguidu hadeer deiretamente kaer metin lezada nia liman rua hamutuk hafoin arguidu uza liman parte loos buti lezada nia susun parte loos, depois lezada foti fos iha lafatik laran atu sai husi uma laran arguidu hakuak lezada husi kotuk no buti metin lezada nia hirus matan parte loos no karuk.

Bazeia ba faktu provadu ne'e no tetu mós sirkunstánsia atenuante sira hanesan, primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

### **10. Krime ofensa ba integridade fizika simples ho natureza violénsia doméstika**

Númeru prosesu : 0019/21.BCLGA  
Kompozisaun tribunál : Koletivu  
Juís : Florencia Freitas  
Prokuradór : Dr. Bartolomeu de Araújo  
Defeza : Dr. Sidonio Maria Sarmiento  
Desizaun : Pena efetinva tinan 2

Iha 15 Fevereiru 2021, Tribunál Distritál Baukau prezide Julgamentu leitura sentensa ba krime ofensa ba integridade fizika simples ho Natureza violénsia doméstika ne'ebé envolve arguidu AVdCP hasoru nian feen, iha Munisípiu Baukau.

### **Akuzasaun Prokuradór**

Prokuradór akuza katak iha 10 Setembru 2021 iha oras tuku 13:30 lokraik arguidu la'ó hasoru malu ho lezada no lezada husu osan atu hola sira nia nesidade uma laran, maibé arguidu la fó no lezada ejize nafatin, nune'e arguidu nerbosu tuku dala ida iha lezada nia ulun, tuku dala ida iha hasan parte karuk, tuku dala ida iha tilun hun parte loos, lori besik kanu baku dala ida iha lezada nia ain tuur parte karuk, tebe dala ida iha hirus matan no tebe dala iha kostela rezulta lezada monu ba rai. Arguidu la hamutuk ona ho lezada ho oan sira no la tau matan ba sira nia nesidade moris lor-loron nian.

Prokuradór akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penál to'o tinan 3 ka multa konjuga ho artigu 2, 3 no 35 letra (b) Lei Kontra Violénsia Doméstika.

### **Produsaun ba Prova sira**

Iha prosesu julgamentu arguidu konfesa faktu sira ne'ebé inputa ba niano arguidu rekoñese antes ne'e, arguidu iha antsidente krimenál.

Entretantu lezada mós konfirma faktu hotu iha akuzasaun no sira moris separa ona no arguidu la tau matan ba lezada ho nia oan sira nia moris lor-loron.

## **Alegasaun finál**

Prokuradór alega katak arguidu antes komete krime hanesan hasoru lezada ne'ebé kondena ho pena prizaun fulan neen suspende ba tinan ida no krime sigundu hasoru arguidu nia feen sigundu ne'ebé kondena arguidu ho pena prizaun fulan haat suspende ba tinan ida. Kazu ne'e hatudu prova katak arguidu la hatudu ninia arrependementu iha periodu suspensaun sira, nune'e husu ba tribunál kondena arguidu ho pena prizaun tinan ida suspende ba tinan rua.

Entretantu defeza haktuir katak bazeia ba produsaun prova, Parte defeza konkorda Prokuradór nian alegasaun.

## **Dezisaun**

Depoisde avalia faktu sira ne'ebé produz durante julgamentu, Tribunál julga prosedente akuzasaun no prova katak arguidu komete duni krime ofensa ba integridade física simples ho natureza violénsia doméstika hasoru lezada arguidu iha antesidente kriminál rua ne'ebé arguidu komete antes mak primeiru hasoru lezada hanesan nu'udar feen sigundu prosesu Nuc. 0008/19.BCLGA, desizaun iha 04 Abril 2021 kondena arguidu ho pena prizaun fulan neen suspende ba tinan ida. Akontesemntu sigundu hasoru nia feen primeiru prosesu Nuc. 0008/19.BCLGA, desizaun iha 26 Outubru 2021 kondena arguidu ho pena prizaun fulan haat suspende ba tinan ida. Arguidu la hatudu nia arrependementu banhira tribunál aplika suspensaun ba arguidu, nune tribunál konklui ninia dezisaun hodi kondena arguidu ho pena efetiva tinan ida iha prizaun.

### **11. Krime maus-tratus ba kónjuje**

Nú. Prosesu : 0061/20. VQVQQ  
Kompozisaun Tribunál : Koletivu  
Juis : Dra. Florencia Freitas, Dra. Jumaity Maria Freitas no Dra. Sribuana da Costa  
Prokuradór : Dr. Julio da Silva Correia  
Defeza : Dr. Sidonio Maria Sarmiento  
Desizaun : Pena prizaun tinan 2 suspende ba tinan 2

Iha 15 Fevereiru 2022, Tribunál Distritál Baukau pezide Julgamentu leitura akordaun ba krime maus-tratus ba kónjuje ne'ebé envolve arguidu ASG hasoru nia feen, iha Munisípiu Vikeke.

### **Akuzasaun Prokuradór**

Prokuradór akuza katak iha 05 Dezembru 2020 iha oras tuku 09:00 kalan lezada haruka arguidu atu te'in etu nune'e arguidu ho lezada diskute malu, arguidu hirus tuku dala dala ida iha kanuruk rezulta lezada monu ba rai hafoin arguidu kontinua tebe dala ida iha kidun kaer lezada nian liman hodi dada rezulta lezada nia liman hetan kanek. Iha 11 Novembru 2020 iha oras 11:00 arguidu tuku dala lima iha lezada nia ulun no iha 28 Novembru 2020 tuku 23:00 kalan arguidu tuku dala ida iha lezada nia ulun.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

### **Produsaun ba prova sira**

Iha prosesu julgamentu, arguidu deklara katak faktu no motivasaun iha 05 Dezembru 2020 ne'e los hotu no akontese iha 11 Novembru no 28 Novembru 2020 ho motivasaun arguidu ho lezada diskute malu kona-ba lezada lakohi halo serbisu uma laran ne'e mak arguidu hirus halo agresaun hanesan hakerek iha akuzasaun, arrepende ninia hahalok, foin primeiravés mai hatan iha tribunál, di'ak malu ona no depoisde akontese ikus to'o agora la baku ona lezada.

Iha parte seluk, lezada kontinua konfirma faktu hotu iha akuzasaun no deklara katak akontesimentu ikus ne'e lezada baisesa kalan ida iha ospital no moras sira ne'e kuaze loron lima mak di'ak fali, di'ak malu ona no to'o agora arguidu la baku ona lezada.

### **Alegasaun finál**

Prokuradór haktuir katak arguidu provadu komete krime hasoru lezada bazeia ba arguidu nia konviksaun no konfirmasaun lezada nian ho arguidu nia aktu kruel hasoru lezada nu'udar nian kónjuje, grave liu lezada monu tun arguidu nafatin halo agresaun hasoru lezada arguidu nian konduta ne'e ema violentu, mezmu sira di'ak malu ona, husu atu fó pena ne'ebé bele prevene arguidu ninia hahalok iha futuru no eduka mós comunidade ne'ebé besik arguidu. Ho konsiderasaun sira ne'e hotu, husu ba tribunál atu aplika pena prizaun tinan rua suspende ba tinan tolu.

Enkuantu defeza haktuir katak bazeia ba produsaun prova sira ne' ebe produs iha audensia julgamentu hanesan di'ak malu ona, depoisde akontese la baku ona lezada no sira hamutuk serbisu hodi sustenta ba sira nia família, ho razaun hirak ne'e husu ba tribunál fo pena justu no adekaudu ba arguidu.

### **Desizaun**

Depoisde avalia faktu hotu, tribunál prova katak iha 05 Dezembru 2020 iha oras tuku 09:00 arguidu tuku dala dala ida iha kanuruk rezulta lezada monu ba rai hafoin arguidu kontinua tebe dala ida iha kidun kaer lezada nia liman dada rezulta lezada nia liman hetan kanek. Iha 11 Novembru 2020 iha oras 11:00 arguidu tuku dala lima iha lezada nia ulun no iha 28 Novembru 2020 tuku 23:00 kalan arguidu tuku dala ida iha lezada nia ulun

Bazeia ba faktu provadu sira no tetu mós sirkunstánsia atenuante sira hanesan arguidu foin primeiravés mai hatan iha tribunál, arrepende ninia hahalok, di'ak malu ona, nune'e tribunál konklui prosesu ne'e no kondena arguidu ho pena prizaun tinan rua suspende ba tina rua.

## **12. Krime ofensa ba integridade fizika simples**



Númeru prosesu : 0024/21. LALPL  
Kompozisaun tribunál : Singulár  
Juís : Dra. Sribuana da Costa  
Prokuradór : Dr. Bartolomeu de Araújo  
Defeza : Dr. Germano Guterres Ramos  
Desizaun : Omologa no dezistencia keisa

Iha 21 Feveiru 2022, Tribunál Distritál Baukau liu husi tribunál movel iha Munisípiu Lautein prezide Julgamentu tentativa konsiliaun ba krime ofensa ba integridade fizika simples ne'ebé envolve arguidu Manuel sarmento Mota, Costodio Mota, Delio Mota no Fidelio Mota hasoru lezadu Valente Mota no Anita do santos, iha suku Fuiluru postu administrasaun Lospalos Munisípiu Lautein.

### **Akuzasaun prokuradór nian**

Prokuradór akuza katak iha 07 Maiu 2021 iha oras tuku 13:30 meiodia arguidu Manuel Sarmento Mota deskonfia nian alin ka lezadu faan subar sira nian karau tanba ne'e mosu diskusaun entre sira. Iha diskusaun ne'e arguidu Manuel Sarmento Mota tuku dala barak iha lezadu nia ulun rezulta lezadu monu nune'e arguidu Costodio Mota tebe dala ida nian knosen parte karuk, arguidu Delio Mota tuku no tebe dala barak iha lezadu nia kotuk laran ho tilun hunenkuantu arguidu Fidelio Mota tuku no tebe dala barak iha lezadu nian kotuk laran ho asan parte karuk. Katak iha akontesdementu ne'e arguidu sira mos halo agresaun hasoru lezadu nia feen ka lezada Anita do Santos. Arguidu Costodio Mota tuku dala barak iha lezada nia ulun no tuku dala ida ha matan parte karuk, arguidu Fidelio Mota tebe dala barak iha lezadu nian kotuk laran, arguidu Delio Mota tuku dala barak iha lezadu nia ulunenkuantu arguidu Manuel Sarmento Mota tuku no tebe dala barak iha lezadu nian hirus matan.

Prokuradór akuza arguidu sira ko-autor material kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa.

### **Prosesu tetantiva konsiliaun**

Baziea ba artigu 262 KPP antes tama ba iha produsaun ba prova tribunál halo tentative ba konsiliaun ba krime sira ho natureza semi-públiku. Iha prosesu tentative ba konsiliaun ne'e parte sira konkorda katak arguidu sira husu deskulpa ba lezadu sira no fó sala mós tais mane rua ba lezadu sira hodi hametin fali sira nia relasaun família ho kondisaun hirak ne'e lezadu sira dizizte nian keisa hasoru arguidu sira.

### **Alegasaun finál**

Prokuradór haktuir katak iha tentativa konsiliaun ne'e lezadu sira hakarak deziste nia keisa tanba krime ne'e rasik defende ba keisa nune'e prosesu atu kontinua ka lae ne'e lezitimidade iha lezadu ba tais rua ne'ebé arguidu sira diside husu deskulpa no fo tais rua ba lezadu sira ne'e tenki ho laran nune'e ba futuru labele hamosu tan problema entre sira. Bazeia ba sira nia akordu husu ba tribunal omologa dezistencia keisa refere.

Entretantu, haktuir katak perante tribunal arguidu sira nian hahalok nune' e sira husu ona deskulpa no fo sala tais rua nune' e hametin fali sira nian relasaun. Bazeia ba sira nian akordu husu ba tribunal omologa deziztensia keisa no absolve arguidu husi prosesu.

### **Desizaun**

Depoisde tentative konsilian ne'ebe previstuiha artigu 262 KPP lezadu sira deziste nia keisa hasoru arguidu sira ho kondisaun arguidu sira husu deskulpa no fo ona tais rua ba lezadu sira, nune'e tribunál hasai ninia despaixu hodi omologa dezistensia keisa no absolve arguidu sira husi prosesu.

### **13. Krime danu simples**

Númeru prosesu	: 0011/20. LALMAR
Kompozisaun tribunál	: Singulár
Juís	: Dra. Florencia Freitas
Prokuradór	: Dr. Bartolomeu de Araújo
Defeza	: Dr. Germano Guterres Ramos
Desizaun	: Omologa no dezistensia keisa

Iha 21 Fevereiro 2022, Tribunál Distritál Baukau liu husi tribunál movel iha Munisípiu Lautein prezide Julgamentu tentative konsiliaisaun ba krime danu simple ne'ebé envolve arguidu Jaime Jeronimo hasoru lezadu Ermelinda Miranda, iha suku Ailebere postu administrasaun Iliomar Munispiu Lautein.

### **Akuzasaun prokuradór nian**

Prokuradór akuza katak iha 06 Setembru 2020 oras la apura iha areia paitomar aldeia lailor suku Aileibere iha tempu ne'eba lezada ba to'os haree arguidu nia karau tama lezada nia kintal estraga ai-horis no ai-han sira hanesan batar, ai-farina ai-dila, lakeru fuan, fore tali foremungu no fore rai.

Prokurador akuza arguidu kontra artigu 258 KP kona-ba danu simplis ho nia moldura penál to'o tinan 3 ka multa

### **Prosesu tentativa konsiliaisaun**

Baziea ba artigu 262 KPP antes tama ba iha produsaun ba prova tribunál halo tentative ba konsiliaisaun ba krime sira ho natureza semi-públiku. Iha prosesu tentative ba konsiliaisaun ne'e lezada hakarak deziste ninia keixa hasoru arguidu maibe ho kondisaun arguidu ba ba futuro arguidu tenki kuidadu ninia karau nune'e labale estraga tan lezada nia hahan iha toos entretantu arguidu simu lezada nia pedidu no perante tribunal husu deskulpa ba lezada.

### **Alegasaun final**

Prokuradór haktuir katak iha tentativa konsiliaisaun ne'e lezada la husu ba uat ruma husi arguidu maibe ba futuro arguidu mak tenki kuidadu nia karau nune'e labele estraga tan lezada nia hahan iha toos laran, mesak familia de'it no arguidu mos konkorda no husu

deskulpa ba lezada no lezada dezite tiha nia keisa hasoru arguidu perante tribunal. Nune' e tribunal husu ba tribunal omologa dezistencia keisa refere.

Entretantu, defeza haktuir katak perante tribunal arguidu arrepende ba nian hahalok no husu ona deskulpa ba lezada nu'udar familia. Nune'e husu ba tribunal omologa dezistencia keixa no absolve arguidu husi prosesu.

### **Desizaun**

Depoisde tentative konsilian tuir artigu 262 KPP lezada deziste ona nia keisa hasoru arguidu ho konsiderasaun sira hanesan husu ona deskulpa, nune'e tribunál hasai ninia despaixu hodi omologa dezistencia keisa no absolve arguidu husi prosesu.

### **Krime ofensa ba integridade fizika simples ho Natureza violénsia doméstika**

Númeru prosesu : 0005/21. LALAT  
Kompozisaun tribunál : Singulár  
Juís : Dra. Sribuana da Costa  
Prokuradór : Dr. Bartolomeu de Araújo  
Defeza : Dr. Germano Guterres Ramos  
Desizaun : Pena prizaun fulan 1 suspende ba tinan 1

Iha 21 Fevereiro 2022, Tribunál Distritál Baukau liu husi tribunál movel iha Munisípiu Lautein prezide Julgamentu leitura sentensa ba krime ofensa ba integridade fizika simples ho Natureza violénsia doméstika ne'ebé envolve arguidu APdS hasoru nia feen, iha Munisípiu Lautein.

### **Akuzasaun Prokuradór**

Prokuradór akuza katak iha 27 Janieru 2021 iha oras tuku 08:00 dadeer lezada haruka arguidu haree sira nia oan maibé arguidu rejeita no mosu diskusaun arguidu nerbozu tuku dala ida iha lezada nia ren-toos no tuku dala ida iha hirus matan rezulta bubu no moras iha lezada nia ren-toos no hirus matan.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu deklara katak faktu no motivu problema ne'e loos hotu, depoisde akontese sira di'ak ona, arrepende ba nian hahalok foin primeiravés mai hatan iha tribunál no promete sei la halo tan hahalok ne'e hasoru lezada iha futuro.

Alende ne'e, lezada deklara katak sei halo serbisu iha dapur no fó hatene ba arguidu atu haree labarik labarik maibé arguidu lakohi haree nune'e arguidu ho lezada istoria malu, arguidu nerbosu tuku dala ida iha lezada nia ren-toos no tuku dala ida iha hirus matan depoisde akontese, sira di'ak malu kedas no to'o agora arguidu la baku ona lezada.

## **Alegasaun finál**

Prokuradór haktuir katak arguidu mos iha obrigasaun haree labarik ne'e iha tempu ne'ebe hanesan lezada halo hela serbisu seluk arguidu komete krime ofensa integridade fizika simples hasoru nia feen ho naturéza violénsia doméstika, mezmu sira di'ak malu ona maibé atu halo prevensaun ba arguidu nia hahalok iha futuru, nune;e husu ba tribunál alika pena prizaun fulan ida suspende ba tinan ida.

Enkuantu defeza haktuir katak iha produsaun prova arguidu konfesa ba faktu hotu ne'ebé konstitui ba nia, arrepende nia hahalok, di'ak malu ona no foin primeiravés mai hatan iha tribunál, nune'e husu ba tribunál atu aplika pena ne'ebé adekuadu ba arguidu.

## **Desizaun**

Depoisde avalia faktu hotu, tribunál prova katak arguidu tuku ida iha ren-toos no tuku dala ida iha hirus matan.

Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida.

### **14. Krime ofensa ba integridade fizika simples ho natureza violénsia doméstika**

Nú. Prosesu : 0029/20. LALPL  
Kompozisaun Tribunál : Singulár  
Juis : Dra. Sribuana da Costa  
Prokuradór : Dr. Bartolomeu de Araújo  
Defeza : Dr. Germano Guterres Ramos  
Desizaun : Pena prizaun fulna 1 suspende ba tinan 1

Iha 22 Feveiru 2022, Tribunál Distritál Baukau liu husi tribunál movel iha Munisípiu Lautein prezide Julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu EdC hasoru nia feen, iha Munisípiu Lautein.

## **Akuzasaun Prokuradór**

Prokuradór akuza katak iha 17 Dezembru 2020 iha oras tuku 11:30 meudia la iha motive ruma arguidu basa dala barak iha lezada nia hasan parte karuk no loos, tuku dala barak iha lezada nia kotuk laran.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

## **Produsaun ba prova sira**

Iha prosesu julgamentu, arguidu deklara rekuinese halo agresauun hasoru lezada maibé arguidu rasik la hatene motivu akontese ne'e tanba derepende deit arguidu halo

agresaun hasoru lezada. Arrepente ninia hahalok, foin primeiravés mai hatan iha tribunál depis loron tolu sira di'ak malu fali no to'o agora arguidu la baku ona lezada.

Alende ne'e, lezada mós deklara katak iha uma la hatene buat ida derepente arguidu halo deit agresaun hanesan tuku basa dala barak iha hasan parte karuk no loos tuku mós dala barak iha kotuk laran, di'ak malu ona no depoisde akontese arguidu la baku ona lezada.

### **Alegasaun finál**

Prokuradór haktuir katak arguidu iha uma la iha motivu arguidu halo agresaun hasoru lezada arguidu nian konduta ne'e prenze rekezitu sira husi artigu 145 KP, nune'e mezmú sira di'ak malu maibé nafatin halo prevensaun atu arguidu la repete ninia hahalok hasoru kualker ema iha futuru. Nune'e husu ba tribunál atu kondena arguidu ho pena prizaun fulan ida suspende ba tinan ida.

Entretantu, defeza haktuir katak arguidu kofesa faktu hotu iha akuzasaun, diak malu ona, arrepente ba nian hahalok no foin primeiravés mai hatan iha tribunál. Tanba ne'e husu ba tribunál aplika pena admoestasau ba arguidu.

### **Desizaun**

Depoisde avalia faktu hotu, tribunál prova katak arguida arguidu basa dala barak lezada nia hasan parte karuk no loos, tuku dala barak iha lezada nia kotuk laran.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa faktu sira, arrepente ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e kondena arguidu ho pena prizaun fulan ida suspende ba tinan ida.

## **15. Krime arma brankas**

Númeru prosesu	: 0015/21. LALPL
Kompozisaun tribunál	: Koletivu
Juís	: Dra. Florencia Freias, Dra. Sribuana da Costa no Dr. José António d. Escurial
Prokuradór	: Dr. Bartolomeu de Araújo
Defeza	: Dr. Germano Guterres Ramos
Desizaun	: Pena prizaun tinan 3 suspende ba tinan 3

Iha 23 FEVEREIRU 2022, TRIBUNÁL DISTRIAL BAUKAU LIU HUSI TRIBUNÁL MOVEL IHA MUNISÍPIU LAUTEIN prezide Julgamentu ba krime arma Brankas ne'ebé envolve arguidu Julio Alegria hasoru estadu RDTL iha Suku FUILURU postu administrasaun Lospalos Munisípiu Lautein.

### **Akuzasaun Prokuradór**

Prokuradór akuza katak iha 25 Dezembru 2020 iha oras tuku 08:00 dadeer arguidu ho kondisaun lanu lori samurai ba testemuña Marizito Fernades nia uma no arguidu taa no straga testemuña nia kalen.

Prokuradór akuza arguidu kontra artigu 2 (1) alinea b, (2) alinea e no artigu 20 (1) husi lei Arma Brankas ho nian moldura penál tinan 3 to'o tinan 6

### **Produsaun ba prova sira**

Iha prosesu julgamentu, arguidu deklara momentu ne'e kondisaun lanu no rekuñese uza samurai, arrepnede nia hahalok, foin primeiravés mai hatan iha tribunál, arguidu nu'udar ajudante ba kareta fulan ida ho vensimentu US\$115.00.

Alende ne'e, tribunál presinde testemuña Marizito Fernades tanba arguidu konfesa faktu hotu tuir akuzasaun ne'ebé imputa ba nia.

### **Alegasaun finál**

Prokuradór haktuir katak arguidu konfesa uza-kaer samurai no samurai refere arguidu la uza tuir nia funsaun maibé utiliza fali ba halo krime. Arguidu nia aktu ne'e provadu krime arma brankas ne'ebé imputa ba nia, tanba ne'e husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza akresenta katak iha produsaun prova arguidu konfesa koopera justisa no arrepende ba ninia hahalok tanba ne'e husu ba tribunal atu aplika pena ne'ebé justu no adekuaudu ba arguidu.

### **Desizaun**

Depoisde avalia faktu hotu, tribunál prova katak arguidu uza samurai ba estraga testemuña nia kalen.

Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

#### **16. Krime ofensa ba integridade física simples ho natureza violénsia doméstika**

Nú. Prosesu : 0009/21. LALPL  
Kompozisaun Tribunál : Singulár  
Juis : Dra. Florencia Freitas  
Prokuradór : Dr. João Marques  
Defeza : Dr. Germano Guterres Ramos  
Desizaun : Pena fulan 1 suspende ba tinan 1

Iha 23 Feveiriu 2021, Tribunál Distritál Baukau liu husi tribunál movel iha Munisípiu Lautein prezide Julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AG hasoru nia feen, iha Munisípiu Lautein.

### **Akuzasaun Prokuradór**

Prokuradór akuza katak iha 11 Feveireiru 2021 iha oras tuku 17:00 lokraik arguidu ho lezada iha toos, arguidu tuku lezada nia hasan parte loos dudu lezada monu ba rai, sama lezada nia hasan parte karuk buti lezada nia ibun foti ai-sanak atu sena ba lezada nia ibun maibé la konsege no uza ai-refere baku dala rua lezada nia kidun hafoin lezada halai ba nian inan-aman nia uma.

Prokuradór akuza arguidu komete konkursu krime rua kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu deklara katak momentu ne'e arguidu kondisaun lanu no bainhira oin mós mak foin hatene katak baku ona lezada, di'ak malu ona, arrepende nia hahalok, foin primeiravés mai hatan iha tribunál.

Alende ne'e, lezada deklara katak arguidu ho kondisaun lanu lezada la hatene buat ida derepente arguidu halo agresaun hasoru lezada hanesan iha akuzasaun, di'ak malu ona depoisde akontese to'o agora la baku ona lezada.

### **Alegasaun finál**

Prokuradór haktuir katak arguidu provadu komete krime hasoru lezada bazeia ba arguidu nia deklarasaun no lezada nia konfirmasaun mezmu sira di'ak malu ona maibé nafatin atu prevene sira nia moris hamutuk iha futuru hodi la repete tan nia hahalok hasoru membru família. Nune'e husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak momentu ne'e arguidu kondisaun lanu no bainhira konsiente fali foin hatene katak halo ona agresaun hasoru lezada. Arrepende ninia hahalok, di'ak malu ona ho lezada no foin primeiravés mai hatan iha tribunál. Tanba ne'e husu ba tribunál aplika pena maiz adekuadu ba arguidu.

### **Desizaun**

Depoisde avalia faktu hotu, tribunál prova katak arguidu tuku lezada nia hasan parte loos dudu lezada monu ba rai, sama lezada nia hasan parte karuk buti lezada nia ibun foti ai-sanak atu sena ba lezada nia ibun maibé la konsege no kontinua baku dala rua iha lezada nia kidun.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no intende katak arguidu komete krime hasoru lezada nu'udar nian feen, nune'e tribunál kondena arguidu ho pena prizaun fulan ida suspende ba tinan ida.

## **17. Krime ofensa ba integridade fizika simples ho natureza violénsia doméstika**

Nú. Prosesu : 0074/21. LASIC  
Kompozisaun Tribunál : Singulár  
Juis : Dra. Florencia Freitas  
Prokuradór : Dr. Bartolomeu de Araújo  
Defeza : Dr. Grigório Maria Lourdes de Lima  
Desizaun : Pena únika fulan 4 suspende ba tinan 1

Iha 23 Feveireiru 2021, Tribunál Distritál Baukau liu husi tribunál movel iha Munisípiu Lautein prezide Julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MR hasoru nia feen AAdC no oan AdCF, iha Munisípiu Lautein.

### **Akuzasaun Prokuradór**

Prokuradór akuza katak iha 11 Outubru 2020n iha oras tuku 20:00 kalan arguidu fila husi serbisu no la hasee arguidu nune'e arguidu hirus hodi lampra tuda lezada maibé la kona, arguidu foti ai-rotan baku dala tolu iha lezada nia kotuk laran no rotan nia tutun kona lezadu AdCF (arguidu ho lezada nia oan) nia isin.

Prokuradór akuza arguidu konkursu krime kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu deklar katak faktu ne'ebe akuza ba nian ne'e loos hotu, depoisde akontese di'ak malu kedas no kontinua moris hamutuk nu'udar feen ho oan, arrepende nia hahalok, foin primeiravés mai hatan iha tribunál, arguidu serbisu nu'udar agrikultór rezultadu hodi sustenta de'it ba familia.

Entretantu lezada deklar katak momentu ne'e arguidu deskonfia lezada amante ho mane seluk ne'e mak mosu diskusaun arguidu hodi lampra tuda ba lezada maibé kona no foti fali rotan hodi baku dala tolu iha lezada nia kotuk laran mak tutun kona sira nia oan ne'ebe lezada kous hela. Depoisde akontese sira di'ak malu fali no agora daduk sira hamutuk servisu hodi sustenta ba sira nian moris.

### **Alegasaun finál**

Prokuradór haktuir katak iha audénsia julgamentu arguidu konfesa no lezada konfirma faktu hotu iha akuzasaun, bazeia ba lezada nia deklarasaun sira ne'e no prokuradór konsidera katak krime agresaun ne'e ejiste duni, nune'e husu ba tribunál atu kondena arguidu ho pena únika fulan tolu suspende ba tinan ida.

Enkuantu defeza haktuir katak bazeia ba produsaun prova sira ne'ebé produs iha audeénsia julgemntu henesan, arguidu konfesa, di'ak malu ona, depoisde akontese la baku ona lezada no sira hamutuk halo serbisu hodi sustenta sira nia família ho razaun hirak ne'e husu ba tribunál aplika pena ne'ebé adekuadu ba arguidu.

### **Desizaun**



Depoisde avalia faktu hotu, tribunál prova katak arguidu foti rotan baku dala tolu kona iha lezada AadC nia kotuk laran no rotan nian tutun kona lezadu AdCF nia isin.

Bazeia ba faktu provadu sira no tetu mós sirkunstánsia atenuante sira hanesan arguidu di'ak malu ho lezada, nune'e tribunál konklui prosesu ne'e no kondena arguidu ho pena únika fulan haat suspende ba tinan ida.

### **18. Krime ofensa ba integridade fizika simples ho Natureza violénsia doméstika**

Númeru prosesu	: 0015/21. LALPL
Kompozisaun tribunál	: Singulár
Juís	: Dr. José António d. Escurial
Prokuradór	: Dr. Bartolomeu de Araújo
Defeza	: Dr. Germano Guterres Ramos
Desizaun	: Pena multa US\$15.00

Iha 23 Feveireiru 2022, Tribunál Distritál Baukau liu husi tribunál movel iha Munisípiu Lautein prezide Julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu CMG hasoru nia feen, iha Munisípiu Lautein.

#### **Akuzasaun Prokuradór**

Prokuradór akuza katak iha 14 Marsu 2021 iha oras tuku 16:00 lokraik arguidu ho nia oan baku malu nune'e lezada hasee arguidu nune'e arguidu ho lezada diskute malu, arguidu nerbozu rasta lezada nia fuuk rezulta lezada nia ulun moras.

Prokuradór akuza arguidu kontra artigo 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigo 2, 3(a), 35(b) no 36 LKVD.

#### **Produsaun ba prova sira**

Iha prosesu julgamentu, arguidu deklara katak sira prepara ba sira nia oan feto ida mate nia ai funan mak arguidu haree sira nian oan nain rua istoria malu ne'e mak arguidu siak no hakilar no lezada mai diskute malu fali ho arguidu tanba ne'e mak halo arguidu hirus rasta lezada nia fuuk, depoisde akontese liu laron ida sira di'ak malu kedas, arrepende ninia hahalok foin primeiravés mai hatan iha tribunál, durante sira forma familia iha tinan 1988 no iha oan nain hitu foin primeiravés mai hatan iha tribunál. Arguidu serbisu nu'udar agrikultór no bada'en.

Alende ne'e, lezada mós konfirma katak sira nia oan histori mak arguidu hakilar lezada nune'e sira diskute malu no arguidu hirus no halo agresaun hasoru lezada, rasta lezada nia fuuk no lezada sente moras no lezada ba hato'o keixa iha eskuadra Polísia Lospalos, depoisde akontese liu laron ida sira di'ak malu kedas no to'o agora arguidu la baku ona lezada.

#### **Alegasaun finál**

Prokuradór haktuir katak arguidu la merese atu halo agresaun ne'e hasoru lezada, arguidu mak la kontrola-an hodi halo fali agresaun hasoru lezada, mezmua sira di'ak malu ona maibé nafatin husu ba tribunál atu kondena arguidu ho pena multa US\$15 durante loron 60 kada loron selu osan 0,50 sentavus.

Enkuantu defeza haktuir katak arguidu konfesa faktu hotu, di'ak malu ona ho lezada, arrepende ninia hahalok, durante forma família iha tempu naruk nia laran foin primeiravés halo agresaun hasoru lezada, nune'e husu ba tribunál atu fó pena ne'ebe maiz adekuadu ba arguidu.

### **Desizaun**

Depoisde avalia faktu hotu, tribunál prova katak arguidu rasta lezada nia fuuk.

Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$15.00 ne'ebé arguidu sei selu osan 0,50 sentavus kada loron durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

### **19. Krime ofensa ba integridade fízika simples ho natureza violénsia doméstika no arma brankas**

Nú. Prosesu	: 0009/20. MNLLB
Kompozisaun Tribunál	: Koletivu
Juis	: Dra. Sribuana da Costa, Dra Florencia Freitas no Dr. José António d. Escurial
Prokuradór	: Dr. Ambrosio Rangel Freitas
Defeza	: Dr. Sidonio Maria Sarmiento
Desizaun	: Pena únika tinan 3 suspende ba tinan 3

Iha 28 Feveireiru 2022, Tribunál Distritál Baukau prezide julgamentu leitura akordaun ba krime ofensa ba integridade fízika simples ho natureza violénsia doméstika no arma brankas ne'ebé envolve arguidu FS (tiun) hasoru nia subriña TC no Estado RDTL iha Munisípiu Manatuto.

### **Akuzasaun Prokuradór**

Prokuradór akuza katak iha 21 Jullu 2020 iha oras tuku 09:00 dadeer lezada tuur suku hela hena borda derepente arguidu mosu see katana iha lezada nia ulun leten no *hateten loron ida ó sei lori ó nia isin hodi selu* derepente arguidu taa lezada nia ren-toos parte karuk, lezada tenta atu halai maibé la konsege tanba nia oan nai rua mós tuur hela. Lezada ba tratamentu iha sentru saúde no kanek refere suku pontu rua.

Prokuradór akuza arguidu komete konkursu krime kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD no artigu 20 (1), artigu 2 (2 alinea f) kona-ba Lei Arma Brankas ho moldura penál tinan 3 to'o tinan 6.

### **Produsaun ba prova sira**

Iha prosesu julgamentu, arguidu deklara katak lezada la'o sai tiha no arguidu haree lezada nia oan ki'ik tee-an no kose tee ba nia isin nune'e arguidu mós ba fase nia oan nia foer ne'e bainhira lezada mosu mai arguidu husu lezada *ó ba ne'ebé mak labarik tee-an foer loos ne'e'* lezada hatan arguidu dehan *ó la manda hau*, arguidu hirus foti katana no uza katana nia kotuk taa iha lezada nia ulun, arguidu la dehan liafuan *loron ida ó sei lori ó nia isin hodi selu*. Depois akontese, diak malu fali, arrepende ninia hahalok, foin primeiravés mai hatan iha tribunál no arguidu serbisu hanesan agrikultór rezultadu hodi sustenta de'it ba família.

Entretantu, lezada deklara katak momentu lezada tuur suku hela derepente arguidu mai koalía liafuan *loron ida o sei lori o nia isin hodi selu* derepente katana kona lezada nia ulun no lezada la hatene katana nia kotuk ka katana nia isin kroat mak kona tanba lezada hakruk la haree, depoisde akontese sira di'ak malu fali no to'o agora arguidu la halo ona agresauñ hasoru lezada.

### **Alegasaun finál**

Prokuradór haktuir katak arguidu provadu tanba arguidu rasik no lezada konfirma. Tanba ne'e, husu ba tribunál atu kondena arguidu ho pena únika tinan rua fulan neen suspende ba tinan tinan tolu.

Entretantu defeza haktuir katak arguidu konfesa, di'ak malu ona ho lezada, arrepende ninia hahalok to'o agora sira moris hamutuk nafatin nu'udar tiun ho subriña. Tanba ne'e, husu ba tribunál atu fo pena ne'ebé kmaan ba arguidu.

### **Desizaun**

Depoisde avalia faktu hotu, tribunál prova katak arguidu mosu se katana iha lezada nia ulun leten no taa lezada nia rein toos parte karuk no Lezada ba tratamentu iha sentru saude Laklubar no kanek refere suku pontu rua.

Bazeia ba faktu provadu sira ne'e no tetu mós sirkunstánsia atenuante sira hanesan arrepende ninia hahalok, foin primeravés mai hatan iha tribunál, di'ak malu ona nune'e tribunál konklui prosesu ne'e kondena arguidu ho pena únika tinan tolu suspende ba tinan tolu.

## **20. Krime omisídiu simples no arma brankas**

Nú. Prosesu : 0095/20. BCSIC  
Kompozisaun Tribunál : Koletivu  
Juis : Dra. Sribuana da Costa, Dra Florencia Freitas no  
Dr. José António d. Escurial  
Prokuradór : Dr. João Marques  
Defeza : Dr. Ismail Asunção Lopes (Advogadu)  
Desizaun : Pena prizaun tinan 10 kadeia

Iha 28 Feveireiru 2022, Tribunál Distritál Baukau prezide julgamentu leitura akordaun ba krime omisídiu simples no arma brankas ne'ebé envolve arguidu Joao Freitas da Costa hasoru lezadu Joanico da Costa Perreira no Estadu RDTL, iha postu administrativu Baukau vila Munisípiu Baukau.

### **Akuzasaun Prokuradór**

Prokuradór akuza katak iha 31 Dezembru 2020 iha oras tuku 21:30 kalan iha RSS vila nova Baukau arguidu ho nia grupu halo asaltu no tuda joven sira inklui lezadu husi bairu loriku, katak asaltu ne'e arguidu lori katana no bainhira hasoru lezada direktamente taa lezadu nian ulun rezulta kanek grave no hafoin taa tiha, arguidu halai sees tiha husi fatin akontesimentu ba entrega-an ba Polisia.

Prokuradór akuza arguidu komete konkursu krime kontra artigu 138 KP kona ba omisidui simples ho moldura penál tinan 8 to'o tinan 20 no artigu 20 (1), artigu 2 (2 alinea f) kona-ba Lei Arma Brankas ho moldura penál tinan 3 to'o tinan 6.

### **Produsaun ba prova sira**

Iha prosesu julgamentu, arguidu deklara katak arguidu nian maun nu'udar matan dook no tinan -tinan halo arte rituál ba ema moras sira, derepente lezadu ho nia grupu mai asalta sira no arguidu haree lezadu subar iha ai-lele hun tuda arguidu kona iha arguidu nia kabun nune'e arguidu ba foti katana, duni no kedas lezada dala ida iha ulun, arguidu mos halai entrega-an ba Polisia. Lezada la'os mate iha fatin maibé to'o iha sira nia bairu mak foin mate.

Testemuña Aguida Juleita Freitas Soares deklara katak momentu rona arguidu ho nia grupu mai tuda testemuña nia uma inklui uma sira iha bairu laran, testemuña mos halai sai tanba inklui nia oan nain rua mos ba tuda malu ne'e mak testemuña ba bolu nia oan mai fali uma, hafoin testamuna hateke fila haree lezada lao ho nia kakorok kleuk ne'e mak testemuña ba haree lezadu nia ulun kanek testamuna bolu nia la'en lori kedas lezadu ba Ospital Regionál Baukau.

### **Alegasaun finál**

Prokuradór haktuir katak iha produsaun arguidu konfesa faktu katak uza duni katana taa iha lezadu nia ulun rezulta mate iha ospital, testemuña deklara katak arguidu ho nia

grupu mak mai asalta lezadu nia bairu. Nune'e, husu ba tribunál atu kondena arguidu ho pena úniku tinan sanulu resin rua.

Enkuantu, defeza haktuir katak labele haree de'it ba krime nia rezultadu maibé haree krime ne'ebé arguidu halo mak taa ka krime ofensa integridade fizika grave, tanba ne'e defeza husu absolve arguidu husi krime omisídiu simples. Krime arma brankas parte defeza husu justisa ne'ebé justu ba arguidu.

### **Desizaun**

Depoisde avalia faktu hotu, tribunál prova katak arguidu lori katana taa lezadu nian ulun rezulta kanek to'o mate iha ospital.

Bazeia ba faktu provadu sira ne'e no tetu mós sirkunstánsia atenuante sira hanesan konfesa faktu, arrepende ona ninia hahalok, foin primeraves mai hatan iha tribunal, nune'e tribunál konklui prosesu ne'e kondena arguidu ho pena prizaun tinan sanulu iha kadeia

### **21. Krime ofensa ba integridade física simples ho natureza violéncia doméstika**

Nú. Prosesu : 0052/20.MNMNT  
Kompozisaun Tribunál : Singulár  
Juis : Dra. Sribuana da Costa  
Prokuradór : Dr. Ambrosio Rangel Freitas  
Defeza : Dr. Sidonio Maria Sarmiento  
Desizaun : Pena unika fulan 6 suspende ba tinan 1

Iha 28 Fevreiru 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu ASE hasoru nia feen LAdSdC no oan LDRdRE, iha Munisípiu Manatuto.

### **Akuzasaun Prokuradór**

Prokuradór akuza katak iha 03 Dezembru 2020 iha oras tuku 17:00 lokraik lezada Ledisiza baku malu ho nia alin Ana ho ida ne'e arguidu nerbozu foti ai-sanak baku dala rua iha lezada nia kabun. Katak ho akontesimentu ida ne'e lezada Ledisizia hato'o ba nia inan lezada Luiza nune'e lezada hasee arguidu *ó panleru mak labarik sira baku ó tama baku labarik* ho liafuan panleru ne'e halo arguidu nerbozu no tuku kedas dalatolu iha lezada nia tilun hun parte karuk, tuku dala rua iha lezada nian liman parte loos no tuku tan dala rua iha lezada nian ulun.

Prokuradór akuza arguidu kontra konkursu krime hasoru lezada nain rua artigu 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigu 2, 3, 35(b) LKVD.

### **Produsaun ba prova sira**

Iha prosesu julgamentu, deklara katak lezada Ledisiza baku malu halimar ho nia prima ne'e mak arguidu foti ai-sanak baku dala tolu iha nia ain kabun la'os kabun. Bainhira

lezada Luisa to' o mai dehan arguidu panleru ne'e mak arguidu hirus basa dala tolu iha lezada nia hasan parte loos besik tilun hun no tuku dala rua iha ulun.

Entretantu lezada deklara katak Luisa deklara katak mosu duni diksusaun kona ba arguidu baku lezada Ledisiza no lezada dehan arguidu panleru nune'e arguidu tuku kedas dala tolu iha lezada nia tilun hun parte karuk, tuku dala rua iha lezada nia liman parte loos no tuku tan dala rua iha lezada nian ulun no lezada Ledisiza deklara katak arguidu baku ai sanak dala rua iha ain kabun.

### **Alegasaun finál**

Prokuradór haktuir katak iha audensia julgamentu arguidu konfesa parsiamente maibé lezada lusia konfirma akuzasaun no lezada Ledisiza konfirma arguidu nian deklarasan katak baku iha ain-kabun. Mezmu sira di'ak malu ona maibé nafatin tau atensaun ba arguidu nian konduta iha futuru hodi labele toman-an halo agresaun hasoru membru familia. Tanba ne'e husu ba tribunal aplika pena unika tinan ida fulan neen suspende ba tinan rua.

Enkuantu defeza haktuir katak mezmu arguidu konfesa parsialmente maibé arguidu nafatin konfesa faktu sira ne'ebé konstitui ba krime ne'ebé hasoru lezada, depoisde akontese sira di'ak mlau kedas, la baku ona lezada sira arrepende sira nia hahalok, nu'udar agrikultór rezultadu sustenta de'it ba família ho razaun hirak ne'e husu ba tribunál fo pena ne'ebé kmaan ba arguidu

### **Desizaun**

Depoisde avalia faktu hotu, tribunál prova katak arguidu uza ai-sanak baku dala rua oan nian ain-kabun no halo agresaun hasoru nian feen hanesan tuku dala tolu iha lezada nian tilun hun parte karuk, tuku dala rua iha lezada nian liman parte loos no tuku tan dala rua iha lezada nian ulun.

Bazeia ba faktu provadu sira ne'e no tetu mós sirkunstánsia atenuante sira hanesan konfesa faktu, arrepende ona ninia hahalok, foin primeraves mai hatan iha tribunal, di'ak malu ona nune'e tribunál konklui prosesu ne'e kondena arguidu ho pena unika fulan neen suspende ba tinan ida.

## **22. Krime ameasa no arma brankas**

Númeru prosesu	: 0011/20. BCVMS
Kompozisaun tribunál	: Koletivu
Juís	: Dra. Sribuana da Costa, Dra. Florencia Freitas no Dra. Jumiaty Maria Freitas
Prokuradór	: Dr. João Marques
Defeza	: Dr. Sidonio Maria sarmento
Desizaun	: Omologa no Pena prizaun tinan 3 suspende ba tinan 3

Iha 28 Fevereiru 2021, Tribunál Distritál Baukau prezide Julgamentu tentativa konsiliaun ba krime ameasa no produsaun prova ba krime arma Brankas ne'ebé

envolve arguidu Johanes Antonio Gonzaga da Silva hasoru nian feen Bendita de Jesus Freitas no Estado RDTL, iha Munisípiu Baukau.

### **Akuzasaun Prokuradór**

Prokuradór akuza katak iha 25 Setembru 2020 iha oras tuku 10:00 dadeer arguidu foti katana no amesa lezada dehan *'hau sei taa mate ó ho nia inan-aman'*. Motivu husi akontesementu ne'e tanba testemuña lori labarik sira ba nia inan-aman nia uma la fó hatene arguidu.

Prokuradór akuza arguidu kontra artigu 157 KP kona ba amesa ho muldura penal to'o tinan 1 ka multa no artigu 20 (1) husi lei Arma Brankas ho moldura penal tinan 3 to'o tinan 6.

### **Tentativa konsiliaun**

Antes tama ba produsaun ba prova sira, bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu ho lezada relasiona ho krime amesa hasoru lezada tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun ne'e, lezada hakarak deziste nia keixa hasoru arguidu. Bazeia ba konkordansia husi parte rua ne'e, tribunál omologa tiha keixa ne'e. Entretantu ba krime arma brankas, tribunál kontinua ba prosesu julgamentu.

### **Produsaun ba Prova sira**

Iha prosesu julgamentu arguidu deklara katak faktu ne' ebe iha akuzasaun ne'e konfesa faktu hotu iha akuzasaun ne'e loos hotu, arrepende ninia hahalok no foin primeiravés mai hatan iha tribunál.

Tanba arguidu konfesa nune'e tribunál presinde testemuña.

### **Alegasaun finál**

Prokuradór haktuir katak arguidu provadu uza katana no hatauk testemuna, atu halo prevesaun ba arguidu atu larepete tan nia aktu iha futuro, husu ba tribunál atu kondena arguidu ho pena mínimu husi moldura penal suspende ba periodu hanesan.

Entretantu, defeza akresenta katak iha produsaun prova arguidu konfesa ba faktu hotu, arrepende ninia hahalok, tanba ne'e husu ba tribunál aplika pena ne'ebé kmaan liu ba arguidu.

### **Desizaun**

Depoisde avalia faktu hotu, tribunál prova katak arguidu uza katana amesa lezada

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok no foin primeravés mai hatan iha tribunál,

nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)